

प्रमुख समाचार –

- 1— छत्तीसगढ़ राज्य स्थापना दिवस के मउका म एक नवंबर के प्रदेश म दीया जलाय जाही।
- 2— रईपुर नगर दक्षिण विधानसभा सीट बर होवत उपचुनाव म नाव वापस लेके आखिरी दिन आज एक झन प्रत्यासी के नाव वापसी के बाद अब तीस झन उम्मीदवार मन ह चुनाव मैदान म हवय।
- 3— दीवाली अउ छठ पर्व के दउरान ट्रेन म होवइया भीड़ ल संभाले बर अउ यात्री मनके सुविधा बर रेलवे डहार ले स्पेसल ट्रेन चलाय जावत है।

राज्य स्थापना-दिवस

छत्तीसगढ़ राज्य स्थापना दिवस के मउका म एक नवंबर के प्रदेश के सबो जिला मुख्यालय अउ प्रमुख नगर म दीया जलाय जाही। ए संबंध म सामान्य प्रशासन विभाग ह जिला कलेक्टर मन ल परिपत्र जारी कर देहे। एमा केहे गो हवय कि लोगन ल अपन घर म राज्य स्थापना दिवस के सेति दीया जलाय बर अपील करना निश्चित करे जाय।

उहें, सामान्य प्रशासन विभाग ह प्रदेश के सबो जिला मुख्यालय म राज्योत्सव के मउका म होवइया सांस्कृतिक कारीकरम के बारे म घलो निरदेश जारी कर देहे। ए कारीकरम म हरेक जिला म मंत्री, सांसद अउ विधायक मन सामिल होही। जेखर सूची सामान्य प्रशासन विभाग ह जारी कर देहे। रईपुर म होवइया मुख्य कारीकरम म मुख्यमंत्री विष्णुदेव साय सामिल होही।

राजधानी के नवा रईपुर म चार ले छै नवंबर तक होवइया राज्योत्सव अउ राज्य अलंकरण समारोह म यात्री मनके सुविधा ल धियान म राखत बीआरटीएस बस चलाय जाही जउन ह बिहनिया ग्यारा बजे ले रतिहा नौ बजे तक हर आधा घंटा म चलही।

एम्स रायपुर-ड्रोन सुविधा

आयुष मंत्रालय ह काली नई दिल्ली के अखिल भारतीय आयुर्वेद संस्थान मन म नौवां आयुर्वेद दिवस मनाइस, जेमा प्रधानमंत्री नरेंद्र मोदी ह कतकोन परियोजना के उद्घाटन करीन। उहें, आयुष्मान भारत-प्रधानमंत्री जन आरोग्य योजना के बिस्तार बर कतकोन स्वास्थ्य सुविधा के आधारसिला राखिन। ए परियोजना म ड्रोन स्वास्थ्य आउटरीच सेवा घलो सामिल हे। रईपुर के अखिल भारतीय आयुर्विज्ञान संस्थान-एम्स म घलो ए सेवा के वर्चुअल उद्घाटन प्रधानमंत्री ह करीन।

एम्स रईपुर के कार्यकारी निदेशक अउ सीईओ लेफ्टिनेंट जनरल अशोक जिंदल ह आकाशवाणी समाचार ले गोठबात म बतइन कि ए ड्रोन सेवा प्रदेश के दूरदराज के क्षेत्र मन म स्वास्थ्य देखभाल के पहुँच बढ़ाय बर प्रौद्योगिकी के उपयोग के संग एक ठन बड़े कदम हे।

एम्स के रईपुर परिसर म सांसद बृजमोहन अग्रवाल ह ड्रोन ल ऑडिटोरियम के बाहर उड़ाय बर बटन दबइन।

नगरनार स्टील प्लांट-उपलब्धि

बस्तर के नगरनार स्टील प्लांट ह बड़े उपलब्धि हासिल करे हे। अब ए प्लांट ह दू मिलियन टन के उत्पादन लक्ष्य ल पार कर डरे हे। ए प्लांट ल सालाना तीन मिलियन टन उत्पादन के संग सुरू करे गो रिहीस। पंद्रा अगस्त दू हजार तेईस के ए प्लांट के ब्लास्ट फर्नेस

के कमीशनिंग करे गे रिहीस अउ ए प्लांट ह देस के आने इस्पात सयंत्र ल पाछू छोड़त सिरिफ दू सौ छब्बीस दिन के कम समय म ए उपलब्धि ल हासिल कर लेहे। उंहे, एक्केच दिन म एनएसएल के ब्लास्ट फर्नेस ह सात हजार दू सौ अड़सठ टन हॉट मेटल के उत्पादन करिस।

खबर के मुताबिक नगरनार के मां दंतेश्वरी ब्लास्ट फर्नेस म एके दिन म करीबन साढ़े नौ हजार टन हॉट मेटल बनाय जा सकत हे।

### उपचुनाव—नाम वापसी

रईपुर नगर दक्षिण विधानसभा सीट बर होवत उपचुनाव म नाव वापस लेके आखिरी दिन आज एक झन प्रत्यासी ह अपन नाव वापस ले लीस। एखरे संग अब तीस झन उम्मीदवार मन ह चुनाव मैदान म हवय। आकाशवाणी समाचार ले गोठबात करत रईपुर के उप जिला निर्वाचन अधिकारी उमाशंकर बंदे ह बतइन कि नाव वापसी के संगेच उम्मीदवार मन ल चुनाव चिन्ह के आबंटन कर देहे। रईपुर दक्षिण विधानसभा सीट म तेरह नवंबर के मतदान होही। भारतीय जनता पार्टी ह सुनील सोनी ल मैदान म उतारे हे। उहें, कांग्रेस ह आकाश शर्मा ल अपन उम्मीदवार बनाय हे।

### माओवादी आत्मसमर्पण

बीजापुर जिला म पांच झन माओवादी मन ह पुलिस के आगू आत्मसमर्पण करीन हे। एमा ले एक झन माओवादी उपर पांच लाख के ईनाम रिहीस। आत्मसमर्पण करइया ए सबो माओवादी मन ल राज्य सरकार के पुर्नवास नीति म प्रोत्साहन रासि दे गीस।

### स्पेशल ट्रेन

दीवाली अउ छठ पर्व के दउरान ट्रेन म होवइया भीड़ ल संभाले बर अउ यात्री मनके सुविधा बर रेलवे डहार ले स्पेशल ट्रेन चलाय जावत हे। एमा सनत नगर अउ रईपुर के बीच तीन फेरा बर दीवाली अउ छठ पूजा स्पेशल ट्रेन के सुविधा दे जावत हे। ए ट्रेन सनत नगर ले रईपुर बर इकतीस अक्टूबर अउ सात अउ चौदा नवंबर के रवाना होही। उहें, रईपुर ले सनत नगर बर ए ट्रेन एक आठ अउ पंद्रह नवंबर के चलही। ए ट्रेन के स्टापेज नागपुर, गोंदिया, राजनांदगांव अउ दुरुग म घलो दे गेहे हवय।

बिलासपुर—लोकमान्य तिलक टर्मिनल के बीच एक फेरा बर दीवाली स्पेशल ट्रेन काली अउ आज चलाय गीस।

उहें, दुरुग अउ पटना के बीच अट्ठाईस अउ उनतीस अक्टूबर के एक फेरा बर दीवाली स्पेशल ट्रेन के सुविधा लोगन ल दे गीस।

इही बीच, दक्षिण पूर्व मध्य रेलवे के अंतर्गत अट्ठाईस अउ उनतीस अक्टूबर के एक फेरा बर दीवाली स्पेशल ट्रेन के सुविधा यात्री मन ल दे गीस।

इही बीच, दक्षिण पूर्व मध्य रेलवे के अंतर्गत दीवाली अउ छठ पूजा बर स्टेसन म यात्री मनके सुविधा बर बिसेस तियारी करे गेहे। एमा स्टेसन म उपराहा स्टाफ लगाय गे हे। वरिष्ठ मंडल वाणिज्य प्रबंधक अवधेश कुमार त्रिवेदी के निरदेस म बीस रेलवे अधिकारी अउ दस मुख्य वाणिज्य निरीक्षक मन ल स्टेसन म तैनात करे गेहे। उहें, टिकट काउंटर म यात्री मनके भीड़ ले देखत पर्याप्त टिकट काउंटर के व्यवस्था करे गेहे।

### आरबीआई—90 क्विज प्रतियोगिता

भारतीय रिजर्व बैंक—आरबीआई ह ए बछर अपन नब्बेवां वर्षगांठ मनावत हे। ए मउका म आरबीआई डहार ले देसभर म आने—आने कारीकरम कराय जावत हे। ए कड़ी म आरबीआई आने—आने बिसय के पढ़इया लइका मन बर राष्ट्रीय स्तर के एक ठन क्विज प्रतियोगिता करावत हे, जेमा कतकोन आकर्षक पुरस्कार राखे गेहे। स्नातक पूर्व के लइका मन बर उन्नीस ले इक्कीस सितंबर तक ऑनलाइन आरबीआई नाइंटी क्विज कराय गीस, जेमा तीन हजार चार सौ तीन भाग लीस। एमा चुनेगे नब्बे ठन टीम मन ह पांच नवंबर के रईपुर म राखे गे आरबीआई नाइंटी क्विज म भाग लिही।

### मोबाइल टॉवर

नारायणपुर जिला के कस्तूरमेटा कैम्प म नया मोबाइल टॉवर सुरू हो गेहे। टॉवर के सुरू होय ले एखर फायदा अबूझमाड़ के ग्रामीण मन ल मिलही। संगेसंग ओमन ल मोबाइल कनेक्टिविटी अउ इंटरनेट के घलो फायदा मिलही, जेखर ले ए क्षेत्र म रहइया लोगन सरकारी योजना के जानकारी ले सकही।

### हादसा

धमतरी जिला के बेलरगांव म तालाब म डूबे ले तीन झन नोनी मनके के मउत होगे हे। एमा दू झन सगे बहिनी मन घलो सामिल हे। जानकारी के अनुसार ए नोनी मन ह तालाब म नहाय बर गे रिहीन। इही दौरान एक झन नोनी ह डूबे लगिस तेला बचाय के चक्कर म दू अउ नोनी मन ओखरे संग डूब गीन। सूचना मिले म गांव वाला मन ह मउका म पहुँचिन अउ पुलिस ल खबर दीन। जेखर बाद पुलिस ह सव ल बाहर निकालीस अउ पोस्टमार्टम बर नगरीय शासकीय अस्पताल भेजे गीस।

ऐति, मोहला—मानपुर जिला के अड़जाल गांव अउ राष्ट्रीय राजमार्ग म माल्हर मोड़ तीर होय दू ठन आने—आने सड़क हादसा म दू झन युवक मनके मउत होगिस।

### नरक चौदस

आज नरक चौदस हे, एला रूपचौदस के नाव ले घलो जाने जाथे। परंपरा के अनुसार रूप चौदस म घर के आंगन अउ बाहिर रंगोली सजाके चौदह ठन दिया जलाय जाथे। रौसनी के ए तिहार म दुकान अउ घर मन म बिजली के झालर ले सजावट करे गेहे। संगेसंग घर के बाहिर रंगोली घलो बनाय जावत हे।

मुख्यमंत्री विष्णुदेव साय ह प्रदेशवासी मन ल नरक चौदस अउ दीवाली के बधई दीन हे। काली दीवाली मनाय जाही, जेखर सेति लोगन म बड़ उछाह हे।

राज्यपाल रमेन डेका ह पांच दिन के तिहार धनतेरस, नरक चतुर्दसी, दिवाली, गोर्वधन पूजा अउ भाई दूज बर लोगन ल अपन बधई अउ सुभकामना दीन हे।

\*\*\*\*\*  
\*\*\*\*\*